

四庫全書

史部

欽定四庫全書

史部

欽定八旗通志卷

一百九十九
至二百

欽定四庫全書

欽定八旗通志卷一百九十九

人物志七十九

大臣傳六十五

漢軍正白旗
魏經國

四
楊文乾 楊宗仁 石禮哈 蔡良

孫國璽 三泰 何立柱

楊宗仁

楊宗仁漢軍正白旗人由監生於康熙三十五年

授湖廣慈利知縣四十年五月調藍山四十四年

總督喻成龍巡撫趙申喬疏荐卓異遷甘肅階州
知州四十五年遷蘭州同知四十九年十一月總
督音泰巡撫鄂奇復疏荐五十年五月遷臨洮知
府五十二年以巡撫岳拜疏荐老成練達熟悉番
情授西寧道五十三年七月遷浙江按察使五十
四年十一月丁父憂五十七年八月補廣西按察
使旋署廣西巡撫十一月擢廣東巡撫五十八年

上以直省錢糧虧空甚多令各督撫立法清理宗仁疏言

粵東虧空現在嚴飭各屬勒限追完至於防杜將來惟督撫司道府廳文相砥礪勿藉事勒索無論正雜錢糧知府照例不時盤查庫銀隨征隨解米穀實貯在倉毋許虧缺若州縣自行花費知府寧肯代為彌縫甘蹈分賠之嚴例州縣既無由那移掩飾即虧缺諒必無多亦易補足倘敢徇縱除本官嚴行治罪上司從重議處度上下皆知懾惕若地方有不得已之公務那用難責州縣獨賠又難

使倉庫虧缺應以督撫等所得公項銀抵補如不敷仍設法公捐總不致課帑虛懸於清釐虧空不無小補下部議如所請六十一年十一月

世宗憲皇帝御極授湖廣總督雍正元年正月丁母憂命在任守制并停陞見宗仁疏請停給

恩詔應得本身妻室封典及廕為父母求

諭祭得

旨俞允仍給封廕尋

賜孔雀翎四月疏言湖廣素稱俗薄民刁兵驕吏玩細究其故皆由文武大員向所屬官弁索取陋規節禮州縣必至橫徵私派武弁必至虛兵冒餉兵民挾此逞奸員弁不敢過問臣今槩行禁革不許文官有私派武弁有扣冒之弊庶兵民不得藉詞逞私驕悍之習真可默化潛消再兩湖地方鹽價逐漸增長窮民每興嗟怨揆厥所由各官多貪鹽規商人借此長價即如總督衙門鹽規漸次加至四萬

從前一錢一包之鹽今則公然昂貴至一錢五六分不等臣今盡革鹽規令商人減價出售以惠窮民俾地方漸有起色至於嚴禁官宦富戶囤積止令商販往來俾米價漸平與力行保甲稽查匪類等件皆臣職分應行之事不敢一一瑣陳得

旨覽爾所奏朕深嘉悅在他人猶聽其言而觀其行至於爾則信而不疑斯乃全楚地方否極而泰之機也五月疏荐廣東南海知縣宋瑋陞湖南寶慶知府廣州

左衛守備范宗堯改補湖北漢陽知縣得

旨姑允所請後勿踵行又疏言俸工一項乃

朝廷祿養官役之恩豈可任意飭捐以填貪壑湖廣
州縣以上俸工報捐已經十有餘年總無分厘給
發責成官役枵腹辦事焉能禁其不需索閭閻今
自雍正元年起一切官役應支俸工臣俱令各照
額編支頌俾均沾實惠從前凡有公事無一不令
州縣分捐實皆派累百姓臣通長核算但令州縣

於所得加一耗羨內節省二分解交藩司以充一
切公事之費此外絲毫不許派捐近奉部文又將解
部餘平一分

恩賜免解承辦公事更得有餘况節禮陋規槩行禁革則
州縣亦易於補苴從前虧空矣得

旨所言全是一無瑕疵勉之尋以病請以子榆林道文乾
隨任終養

詔加文乾按察使銜馳驛速赴並

遣御醫診視七月疏言湖北糧道管理全省漕運兵糈一
歲中計有半年公出舊設驛鹽道管全省驛遞號
船應付勘合火牌淮鹽到楚盤驗察私督運額銷
引目職守迥異康熙五十八年依前督臣滿丕奏
以驛鹽道歸併糧道似未妥協請復設以專責成
下部議行九月疏言襄陽府屬之樊城鎮五方雜
處商賈輻輳奸宄易以潛踪請移襄陽府同知駐
樊城彈壓從之又言清淨盜源稽察窩賭窩逃法

莫善於力行保甲臣到任後即通飭所屬令紳衿
兵役與齊民一體編次挨編保甲不許脫漏一戶
聯絡守望百姓稱便誠恐州縣奉行不得法令專
委本管道員稽察如有未盡合法之州縣即令指
示照式編次擇其善者另予優獎得

旨此論甚好凡舉行一法必示以勸懲方期有效耳二年
正月疏言立社倉實係美政臣與各官加意講求
先擇地建倉然後勸捐穀本出納聽民自主不許

官吏會計侵肥並立獎掖尚義之典士民咸踴躍
爭先江夏武昌蒲圻等二十州縣各建倉三五十
所不等約共捐穀本將三十萬石效驗已著臣又
傳湖南循此成法施行得

旨據奏社倉一事於各省中爾先成創始之功殊可褒嘉
三年六月

諭獎督撫諸臣中居官行已可風有位者加宗仁太子少
傅銜七月卒於官年六十有五遺疏入得

旨揚宗仁敬慎持躬廉能供職効力年久懋著勤勞自簡
任總督以來潔已奉公孤介端方始終一節忽聞溘逝
朕追念良臣深為悽惻難釋於懷應沛特恩以示優眷
加贈少保並給騎都尉世職准襲二次仍察例予卹
賜祭葬謚曰清端

御製像贊有廉潔如冰耿介如石向八年入祀賢良祠文
乾仕至廣東巡撫自有傳

蔡良

蔡良漢軍正白旗人祖士英順治年間官漕運總督自有傳父毓茂康熙九年補佐領二十一年授叅領二十五年從征噶爾丹逾年擢京口副都統四十五年高家堰下濬河築堤偕都統孫查齊等往督工四十七年卒

賜祭奠良由閒散於康熙四十二年授佐領四十八年授叅領駐防福州五十八年遷浙江台州副將雍正二年七月

詔直省副將以下游擊以上員弁輪流來京視其漢仗弓馬以辨優劣十一月良於箭亭引

見射箭

命發往陝西四年四月補漢中副將六月遷延綏總兵八月調江西南贛總兵九月擢福州將軍五年二月奏言閩省四旗披甲人等臣現在訓練鎗箭務令精熟行走不許怠惰其不能節省行事不合者盡力整頓更有兵丁之弟男子侄雖係壯丁尚未披

甲游手好閒遇事生風自以閒散無人約束官長亦慢不稽查今飭令各旗協叅領防禦驍騎校等官將壯丁內力可營生者任其自贍仍不時查察其餘皆帶領習學鎗箭稽查出入行走之處若技藝嫻熟毫無過犯遇有甲出即選擇頂補倘不肯習學而又為非雖本家甲出亦不准頂補仍責成父兄親族勸其悔改既開其上進之路又示以不能得甲之勢則知法者更加勉勵即游手亦不敢

為非矣得

旨此奏甚屬可嘉但務實力為之加勉勿懈六年四月奏
言閩省駐防習氣不好臣留心體察實力挽回至
節儉所以省財亦以惜福每於操演地方諄切曉
諭務敦節儉禁紛華近來奢靡漸歛再如賭博酌
酒尤為不法先飭四旗該管官嚴行約束又每旗
派撥官一員領催數名各按所管稽查得

旨嘉獎十一月叅奏左營副將金國泰右營游擊吳廷元

酹酒不職

詔革二人職

諭內閣曰將軍蔡良覽其陳奏具見實心辦事伊名下有
代父應賠銀兩特加恩免其賠補以示眷注七年三月
奏言駐防兵丁向年賭風甚熾已嚴飭查訪又于
八旗派出領催四十名臣標四營派出百隊二十
名每月一換責令專管查拏今賭風亦覺斂息風
俗人心可漸轉移再查駐防報逃者甚多大半皆

係所買民人此輩原無根底無知兵壯只圖身價
無幾可得人用犯逃在外為匪不免株連前奉

諭旨嚴禁旗下不許擅買民人臣凜遵

聖諭飭令只許八旗兌買其從前所買民人如果安分准
其留用倘有犯逃者即係自回亦必令其交還原
中保領去收回身價仍委協領一員專司其事或
徇私容隱本犯照例治罪官以失察糾叅領催一
體連坐得

旨照所奏實力整頓開導毋得始勤終怠六月

上諭蔡良訓練約束兵丁勤慎得法福州駐防營伍大為
整理著調補廣東將軍九月奏言廣州駐防兵壯向樂
游嬉往往不能安分臣於較閱聚集時面為曉諭
操差務要精勤使令必聽管束進退合于規矩上
下須別尊卑俾人人知法紀當遵惡習當改其壯
丁人等俱飭不時稽查勿令外出閒游使之學習
技藝再查廣州五方聚會地當濱海最易藏奸前

任將軍石禮哈編設保甲實為清弊之要但民人
雜處則其來歷眷口悉應填註更有如鑲黃旗兵
壯住居正黃旗汛地者或係租賃彼旗房屋在住
址原難畫一編入保甲自應聽其查點而本旗該管
人員亦應赴彼稽查不得置之不問則逃人可漸
稀少得

旨所奏二條可嘉再如奢靡之習尤當加意訓誡此為養
兵根本之道慎勿稍忽九年十二月卒

予祭葬如例謚勤恪十年二月

上以將軍蔡良與提督張起雲總兵蘇大有魏國者皆素有賢聲勤勞王事宜在賢良之列

命直省建祠祀之

魏經國

魏經國漢軍正白旗人由熱河把總累遷至守備
康熙五十年

特擢通州副將

上以經國家貧

賜銀五百兩

命子姪隨任五十七年擢江南蘇松水師總兵五十八年

調天津總兵六十年六月遷湖廣提督赴熱河請

訓適兵部引

見大選官員

上命經國近前令舉所知

命會同步軍統領選京營守備千總帶楚補用雍正元年

奏稱到任後將一應陋規盡行裁革飭令各營修
罷械勤操練得

旨湖廣通省被五六庸夫敗壞賴爾一人幸保無事厥功
不小三年加太子少傅調補江南松江提督尋加兵部
尚書銜世襲騎都尉四年疏言江省竊案較他省
獨多緣財賦之區商旅輻輳加以支河小港易於
藏奸晝潛夜出難以稽查臣設巡船遣目兵輪流
巡緝并飭通省水陸各營一體巡查盜風庶可息

得

旨該管協營悉飭令寔力為之五年八月疏言臣子湖廣
提標中營守備魏瓚荆門營遊擊魏琨奉

旨命臣携至江南以遊擊守備題補臣長子魏瓚業荷
特恩准補臣標中營守備請以次子魏琨

賜補泰州營遊擊臣感

聖主矜憐令臣父子同任一方是以冒昧題請下部議從

之十二月奉

旨魏經國由末弁屢次超遷用至提督朕聞伊在楚聲名甚好加恩優待因松江地方緊要將伊調補乃伊沽名釣譽求悅於人以致湖廣營務廢弛即在松江從未奏地方利弊一事亦未舉劾一人所長不過操守一節其屬官弁賢不肖皆相安而昵愛之故京師稱道者多觀其行事實足為政事人心之害著革太子少傅尚書銜並世職回京另用六年授鑲紅旗漢軍都統七年正月署直隸古北口提督閏七月請改石匣營遊擊為

順義營遊擊石匣營中軍守備為順義營中軍守
備並增撥兵丁三百名駐順義移漕河把總駐牛
欄山順義把總駐楊各莊從之九月疏言熱河一
帶地方路通各口建立

行宮四方貿易絡繹不絕近省貧民俱托足餬口臣親歷
河屯營十汛見人烟稠密戶口殷繁外來游民蝟
集游閑滋事者不少理事同知一員約束難周熱
河迤東一百八十里地名八溝接連蒙古行商多

聚於此最為繁雜請增設通判巡檢等官與同知
分管東河西河部議從之八年二月疏言武職親
丁名糧前經河東督臣田文鏡奏准馬步各半各
省一體遵照臣查各省營制大率馬二步八然有
馬糧甚少僅供差防者有祇設守糧無馬糧者有
設馬步戰糧無守糧者如武職親丁名糧俱准馬
步各半行之河東二省自必相宜若槩以為例似
難通行請將馬糧甚少與祇設守糧之營按馬步

各半之數以二步抵一馬聽提鎮臣酌定至於祇有馬步戰糧並無守糧如古北提標石匣新營各員所食步戰糧較之馬糧祇少草豆乾銀其餉數無異似應照馬二步八留作養糧亦與馬步各半之數相等一變通間實於軍務有裨得

旨覽魏經國所奏有不得不因地制宜之勢其言甚為明晰著直省督撫提鎮各就本地營伍情形議奏並下部知之八月疾作

遣御醫齋藥往視十月卒遺疏入

諭曰魏經國厯練營伍操守潔清向蒙

聖祖仁皇帝深恩由微弁用至湖廣提督朕復授以松江
緊要之任伊居官謹飭砥礪廉隅但遇事瞻徇兼有罷
軟之習是以調取來京切加訓誨上年用為古北口提
督遵朕指示辦理妥協無忝封疆之寄今聞溘逝深可
憫惻應得卹典察例具奏尋

賜祭葬如例謚僖恪

楊文乾

楊文乾漢軍正白旗人湖廣總督宗仁之子由監生効力永定河工康熙五十三年授山東曹州知州五十七年遷東昌府知府六十一年卓異遷陝西榆林道雍正元年加按察使銜

命隨父任侍疾三年正月授河南布政使三月奏言山東曹州西南之桃園集壤接七縣係山東河南直隸交會之區距城遼遠巡察難周奸民朝此暮彼出

沒無常請以曹州州同移駐彈壓如所請行四月
擢廣東巡撫

賜孔雀翎及冠服鞍馬尋丁父憂

命在任守制十二月奏言臣自楚赴粵途中聞告休布政
使朱絳倚與總督孔毓珣姻親虧帑三萬餘兩交
代未清即嚴飭作速賠補

諭曰司庫此項挪用孔毓珣曾經奏過爾等封疆大吏惟
宜一心一德以和為主切勿聽信屬員離間之言以致

好惡參差文乾又奏言臣抵任後查盜案塵積請概為
速結

諭曰盜案非命案可比命案遲延拖累無辜固屬不宜若
因監斃者多遂立意輕縱盜犯尤為不可此事朕難批
諭况亦非摺奏完結之事倘慮積案拖累在汝秉公嚴
催詳情度理而為之孔毓珣於緝捕盜賊甚為盡力彼
擒之汝縱之恐汝難當此論縱虎歸山豈為仁政此等
作為非積陰功乃大壞德行事也若不加意斟酌萬萬

不可四年四月疏言廣東省城盜賊甚多非編保甲不能清理旗兵與民人連居臣擬會同將軍不論滿漢兵民逐以編查省會奸匪既清各府州縣可漸舉行盜風庶少息

諭曰此見甚好弭盜之法此為探本窮源之上策也又疏言廣東去歲薄收今春米價日增臣委員赴廣西買穀運羅詎有鑲黃旗披甲閻尚義等誘集多人赴廠搶穀毆傷監羅官旗兵等赴將軍衙門喊票

將軍李林令赴臣衙門講說尚義等即擁至臣衙門及臣拿獲數人李林令臣釋放臣未聽從又囑理事同知汪茗文求從寬完結杖身膺重任不能約束兵丁事關旗兵鼓衆乞

皇上欽差大臣來粵確審定擬

上命禮部右侍郎塞楞額兵部左侍郎阿克敦往審得寔杖及尚義等俱論罪如律十一月疏言廣東民納糧俱用老戶臣令改立的名今各屬申報或因墾

買過割之際就本名註冊或赴縣完糧時問明辦糧人的名登於原冊老戶下百姓始知改立的名則己身完賦後他人未完者不至累及且就糧管業不致詭寄飛灑諸弊爭先開報一二年後通省俱可改註至丁銀自康熙五十年審定後不復加額廣東丁隨糧辦者已十之四五其未隨糧辦者令布政使確查將丁銀盡歸地糧永免無糧徵銀之累得

旨嘉獎十二月疏言廣東地狹人衆米不敷食積貯宜豫
今現存倉穀百六十餘萬石存七糶三每年出穀
五十萬石春夏二季兵丁於糶三穀內碾撥三十三
萬餘石僅存十七萬石臣為民食久遠計應酌量
要地加貯二百餘萬石擇水陸總口可達數州縣
適中之地建倉貯穀有需即可撥運疏入下九御
議僉以濱海地不宜收貯以致沓爛惟惠潮瓊三
府僻處海隅遇歉歲輓運維艱潮屬之海陽加貯

穀十萬石潮陽加貯穀八萬石程鄉加貯穀六萬石饒平加貯穀二萬石惠屬之海豐加貯穀二萬石瓊屬之瓊山加貯穀六萬石得

旨依議又奏言秋審緩決人犯雖非可矜亦不至情寔請將三次緩決者減等發邊遠為民

諭曰朕甚不取汝此奏且恐汝務小而遺大寬嚴不得其宜朕甚憂之大凡應嚴者既不能嚴則應寬者必不能寬果能以公忠血誠對越天地神明刑所當刑即決人

亦造福之事何況其他四年四月奏言粵省辦公銀
每年六七萬兩向於火耗提用臣商同督臣及
司道等將可省者盡裁必不可少之項約需四萬
兩查民間置產推糧過割例有州縣公費又奉裁
衛所屯糧陋規兩項均可提作公用無用再藉火
耗又各官養廉一項州縣徵收火耗每兩加一其
實連戩頭併封積零合筭一錢三四分不等許解
司平頭三分并繳二三分為修戰船及按察使道

府廳員養廉每兩淨存五六分留作州縣養廉其
解司平頭共三萬兩有奇除每兩撥三釐為布政
使衙門工食外督撫藩司各得養廉銀九千餘兩
俱足用

諭曰但務得中為是若暫邀一時之名使將來至於難措
非善舉也民情亦不可令至驕慢屬員亦不可令至窘
乏天下事惟貴一平所以古人有平治天下之語若一
偏之見致遠恐泥故君子不為利不十不變法害不十

不易制似此通盤更移之舉必徹始徹終籌畫妥當而為之慎毋逞一時之興而輕舉也五年三月乞假葬父先之七月福建巡撫常賚疏叅文乾徵收太平粵海關稅設立專行得銀二十餘萬兩致夷船進口無行承攬去歲將夷人銀豫行加一扣收得銀四萬三千餘兩及上餉復每兩抽分銀三分九厘令六專行先繳又發銀數萬兩於他處買湖絲茶葉等物貯如升行勒令賣完方許各行買貨所以商船稀少

上以常賚所奏銀數未晰洋行貿易外楊文乾再有見小
漁利之處據寔入告嗣常賚疏稱粵海關稅額每
年四萬有奇雍正四年楊文乾奏報連羨餘九萬
有奇臣細訪寔十五萬兩抽分夷人銀二萬餘兩
賄縱紅黃紬緞出洋得銀萬兩於番銀不論是否
買貨先加一扣收得銀四萬餘兩此係例外之求
復選洋船奇巧之物入署令所派專行賠償計銀
二萬餘兩又交鹽商銀萬九千作二萬兩營運生

息此見小漁利處也疏入得

旨從來操守二字寔難得其人在楊文乾自以為不關國計民生設法巧取名寔兼收不知人之耳目如何能欺所謂弄巧成拙若不改悔立見名寔俱敗耳尋

諭楊文乾曰洋行一事確鑿可據汝意以為巧取暗獲名寔兼收殊不知人之耳目難瞞但一圖利誰肯心服汝既巧取獲利而居清官之名屬員亦必令有巧利方可禁其婪取否則雖令不從此干係屬員生效尤之心也

至於百姓汝曾經奏朕粵人惟利是視身命皆視為次
汝一徇利則百姓孰肯感服聽從耶為督撫大吏者既
失屬員百姓之心而欲令地方就理豈可得乎汝若不
深自愧悔痛改前非必至噬臍不及矣八月

上以福建州縣倉庫虧空甚多

命文乾同浙江觀風整俗使許容吏部郎中鄂彌達內務
府員外郎伊拉齊往查文乾疏奏閩省八府中惟
福泉漳三府最要福州府臣就近委盤漳州府擬

委候補知府潘體豐署印盤查郎中鄂彌達督察
泉州府擬委候補知府劉而位署印盤查員外郎
伊拉齊督察延平府擬委建寧府知府莊令翼盤
查其建寧府另行委員盤查其餘府州擬於候補
知府同知內暫委署盤查所報無虧空州縣亦恐
那新掩舊必將各員交錯調用本身一離原地諸
弊盡露

諭曰料理頗好竭力為之文乾又奏言各州縣聞盤查信

紛紛買補興化府倉穀已買足延建邵等府素產米穀今歲年景亦佳現責令速補漳泉福等府素不產米入秋雨稍缺請寬限陸續買足逾限再叅究

諭曰買足者與未買足者原經虧空即屬一體豈可因其現在買足與否而分別之耶若如此不論居官之賢否止看地方豐歉竟論造化而已爾此請旨大謬矣朕意無他將通省人員於此倉穀一案內查其好者概免劣者概去此二句乃朕本意要在爾等秉公論人辦理朕

亦難以詳悉指示總期通盤還朕一是字或能與不能
關保爾一生榮辱看汝之福量何如耳九月疏稱臣在
閩聞廣南韶道林兆惠採買木料被劫又聞有盜
數百搶龍門營七子汛軍器恣劫鄉村署督臣阿
克敦令地方官從寬批結高州府電白縣山內聚
盜千餘白日沿村行劫又聞將軍標兵張萬良窩
盜分贓署撫常賚咨提將軍石禮哈袒護囑令審
作誣良又常賚署中被盜將

御賜奏摺匣之鎖鑰失去而借用將軍之鑰彼此隱匿盜

風日熾乞

敕諭督臣孔毓珣通飭文武勒限嚴緝

諭曰如此據寔陳奏方是汝若身在廣東又未必如此直
達也十二月文乾查明福建倉庫官虧者勒追完補民
欠者陸續催徵無可着追及平糶存價採買不敷
者令前任巡撫毛文銓賠補詳悉入奏

上以文乾秉公辦理毫無瞻顧

命從優議叙部議隨帶加二級又疏稱閩省八府一州知府同知通判州縣共八十員前後叅革改教休致五十餘員其倉庫無虧居官尚好之縣令十餘員俱交錯調用不使仍原任致滋弊端所出之缺於先後

命發人員內量才題補惟是邊海重地俗悍民刁新補各官多係初任若責其典守倉庫則有餘資其治理繁劇則不足乞

皇上再將熟諳民事者發數員交督撫於緊要縣缺補用
可收得人之效得

旨此奏可嘉之至尋

諭各省督撫除川陝雲貴廣西外每省於歷任年久知縣內
擇謹慎敏練者一員一函具奏即行咨送閩省令
該督撫酌補緊要縣缺六年二月疏叅廣東布政
使官達用幕友謝禹臣招搖納賄三月疏叅署巡
撫阿克敦勒索暹羅國船戶葉舜德規禮銀兩

詔革官達及阿克敦職

命文乾同總督孔毓珣會訊未及訊文乾卒得

旨楊文乾才識優長辦事勤敏簡任巡撫以來寔心供職

粵海地方正資料理伊自閩回粵五月間即患畏風心
煩之症而急公心切力疾辦理不以病狀奏聞洵屬殫
力封疆之臣其心寔可憐惜今聞溘逝深為憫惻應得
卹典察例具奏楊文乾樞櫬起程之日着省城官吏齊
集奠送所過廣東地方文武官員親往奠醑並遣人護

送其別省經過州縣亦着地方官照看尋

賜祭葬如例

石禮哈

石禮哈漢軍正白旗人父文焯官至禮部尚書自有傳禮哈初任直隸正定府同知尋援例捐納道員雍正元年改授正定協副將二年遷貴州威寧鎮總兵三年署貴州巡撫

上以其年少屢加

訓諭先是雲貴總督高其倬奏准移大定協弁兵分駐廣
順州所屬長寨遮貢羊城壘等處四年四月長寨
仲苗阿革阿紀等糾眾揚言不容安設營汛壘石
阻路總督鄂爾泰調兵勦撫禮哈偕提督馬會伯
親往督兵進擊直搗長寨擒阿革阿紀及其黨阿
搗阿撈七十餘人遮貢羊城壘五十七寨均乞降
乃宣諭悉歸故業安營設汛而還事

聞

詔獎禮哈臨事果敢交部議叙加三級並

賜還其父文焯巡撫原職互見文焯傳五月擢廣州將軍

十一月抵任遣員採買廣西米石接濟旗營自備
銀一萬兩充運腳費部議叙加二級五年六月以
遵

旨會鞠道員李濱抹頸玷職一案証聽供詞指稱巡撫楊
文乾逼勒所致奉

諭詰責六年三月楊文乾疏奏署羅定州知州李達德因

清查肇慶府知府楊以寧虧項至將軍署謁見石禮哈不能以禮貌接待縱役凌辱

上原其過猶小免究七月

諭曰石禮哈與楊文乾皆實心任事之大臣但恃才自用俱欠和平二人不睦於地方無益石禮哈着調補福州將軍十二月

欽差通政使留保等至廣東疏劾石禮哈在廣州日於正白旗另戶壯丁小衛屢犯竊逃並不緝拏治罪又

標兵朱國用等肆名為盜石禮哈既不將失察各
官據實查叅竟扶同倒提年月詳革名糧應治其
徇情疎縱之罪

詔該部嚴察議奏尋議照溺職例革職從之七年正月
特授鑲白旗漢軍都統七月以大軍分路進勦準噶爾

命石禮哈為北路叅贊大臣十三年還京補鑲紅旗漢軍
都統乾隆二年奉

旨石禮哈每以不知為知舉止乖張不勝其任着革去

都統在散秩大臣上行走不必食俸四年以不勉力行走

命草職發社軍臺効力贖罪七年釋還十二年卒

孫國璽

孫國璽漢軍正白旗人康熙六十年進士雍正元年揀發河南以知縣用補鄆陵縣知縣遷禹州知州四年八月擢開封府知府

特命專摺奏事九月調浙江杭州府知府六年二月擢福

建汀漳道十月調臺灣道國爾璽疏言臺灣諸臣例
不挈眷臣母止臣一子孀居苦節衰老龍鍾現居
漳郡乞准臣每歲內渡省視一二次仍即馳赴任
所奏入

上嘉之即調鹽驛道七年閏七月遷按察使十月擢山東
布政使先是國璽自漳州赴任途次有持署浙江
巡撫蔡仕舫名簡免轉托學政程元章闕預試事
者國璽叱之不以

聞至是事覺

上責之曰凡為臣子者惟當勉一公誠事事無欺無隱與君上一德一心為要朕因觀汝可成大器所以不次擢用諒汝必不負朕也然每遇與汝共事之同寅上司等偶一言及未有不稱道汝者朕少涉疑料汝必由俯仰浮沉取悅干譽之所致今果然矣朕深為之寒心如蔡仕舩免汝轉託程元章一事在他人尚不肯欺隱而據寔奏聞於朕不知孫國璽具何肺腑竟能隱忍而欺朕

似此不明大義不別重輕卑陋鄉愿小人之形態豈能
受朕知遇之人物耶殊大失朕之期望矣國璽尋奏臣
愚昧前因業經面叱並告知程元章未及叅奏並
非畏懼蔡仙舩敢為欺隱

諭另疏補叅並

敕蔡仕舩明白回奏尋下部議仕舩降一級調用九年四
月授國璽大理寺少卿旋署浙江布政使十月署
河東副總河十年十月以河東總督田文鏡患病

命國璽協辦十一月署河南巡撫十一年七月擢左副都御史九月暫署江蘇巡撫十一月署吏部侍郎乾隆元年擢兵部侍郎三年四月授安徽巡撫八月疏言安徽蕪湖鳳陽兩關蕪湖關不徵米稅鳳陽關因毗連江廣販運者多以故按數收課此向例也臣按本年被旱之鳳滁六泗等府州距鳳陽為近請將米穀課稅自本年八月至明歲正月照蕪湖關例免其徵收商賈趨利若鶩勢必踴躍轉輸

似於民食更為通裕得

昔所奏甚是寬徵之期應相其情形何必限以五月耶十月疏言本年江南鄉試輪臣監臨應試舉子萬七千六百有奇入場不遵條約爭先闖捷不聽唱名搜檢給卷後任意遊行多搶號板東西喧嚷至第三場給題紙因人衆紙多印刷不及分給稍遲輒噪集至公堂下經臣再三勸諭立刻補給始各歸號舍夫讀書以養氣為先似此飛揚凌競士氣不

馴已可概見及收卷各官以違式卷呈請貼出多
係正草不全或塗改卷面姓名或正草全無公然
題詩於後或於卷末列寫稟訴之語昔人云士先
器識而後文藝器識既卑雖有文藝亦不足觀此
皆教官平時漫無檢束以致士子倚恃青衿挾制
官長習以為常至三年大比乃進身之階絕無敬
慎顧忌之心即倖列科名

朝廷亦安所用之

敕下學臣行令各學教官督率訓諭務使修文砥行共
相劇切至鄉試之期學臣詳慎遴選分別去取毋
使掛名士籍之徒濫竽徒滋喧競嗣後如不遵

功令擾亂場規本生懲革外將本學教官嚴行叅處
庶頽風可挽士習可端奏入

上以國璽據實直陳不避嫌怨下部議叙予紀錄四年
卒

賜祭葬如例

三泰

三泰漢軍正白旗人曾祖內大臣華善以其先原
係蘇完人姓瓜勒佳奏請改入滿洲籍詳華善傳
祖石文炳襲三等伯官福州將軍父觀音保任都
統三泰由藍翎侍衛游授二等待衛乾隆二十二
年四月遷正紅旗漢軍副都統十月陞吏部右侍
郎二十三年正月軍機處行走四月調戶部左侍
郎六月

詔三泰與尚書納穆扎爾赴西路軍營以叅贊大臣行走學習軍務七月逆回霍集占自庫車敗遁定邊將軍兆惠往擒勦

命納穆扎爾為靖逆將軍與三泰統索倫察哈爾及健銳營官兵往會兆惠軍兆惠軍至葉爾羌令副都統愛隆阿侍衛奎瑪岱以兵來迎納穆扎爾遣愛隆阿先還自與三泰奎瑪岱乘夜進期以黎明趨至兆惠軍營隨行二百騎猝遇賊三千被圍奎瑪

岱死之納穆扎爾矢盡三泰墜馬徒步接戰俱中
創陣歿

上嘉憫其忠毅贈三泰三等子爵並加恩授其兄祥泰
為散秩大臣尋

賜祭葬如例謚果勇入祀昭忠祠回部底定
上追悼納穆扎爾三泰

御製雙義詩紀其事見納穆扎爾傳尋

命圖形

紫光閣

御製贊曰率二百人共詣軍營臨敵而退寧謂忠誠如
早聞信何致殞身不前不後失二賢臣子佛住襲世
爵及散秩大臣現官阿克蘓領隊大臣

何立柱

何立柱漢軍正白旗人初名鈞官副將時始改令
名其先世居蒙古之烏嚕特部曾祖和濟格爾於
天命七年來歸隸入漢軍遂姓何氏祖拜音達禮

襲三等輕車都尉世職歷官至廣州將軍以軍功
晉襲一等輕車都尉並詳和濟格爾傳父何天培
由廕生授佐領康熙三十五年扈

駕征噶爾丹授叅領雍正四年由江南京口將軍擢兵部
尚書緣事鐫級補正白旗漢軍都統六年七月江
蘓巡撫張坦麟鎮海將軍金以坦疏劾天培在將
軍及署巡撫任內貪款劣蹟

命刑部鞫訊得其營私壞法及鑽營年羹堯隆科多諸

罪案擬斬監候乾隆元年

恩釋尋病故立柱於雍正七年降襲二等輕車都尉十三年授三等侍衛累遷頭等侍衛乾隆十六年授浙江嘉興協副將二十三年奉

旨 在頭等侍衛上行走六月授健銳營翼長派往西路軍營剿逆回霍集占二十四年副將軍富德等敗賊於阿爾楚爾立柱在事有功二十七年叙功給雲騎尉世職併所襲為一等輕車都尉尋授湖北

襄陽鎮總兵三十一年調湖南鎮筸鎮總兵三十
三年二月擢雲南提督從將軍明瑞征勦緬甸
尋調貴州提督九月卒於軍營

欽定八旗通志卷一百九十九

欽定四庫全書

欽定八旗通志卷二百

人物志八十

大臣傳六十六

漢軍正紅旗

吳世俊

寧完我

吳守進

焦安民

蘇宏祖

劉清泰

王國光

郎賽

劉秉權

劉漢祚 王

之鼎

吳興祚

吳世俊

孫雲龍

吳世俊漢軍正紅旗人先世居開原

太祖高皇帝天命四年六月征明取開原城世俊隨叔父

吳裕來歸裕任佐領

太宗文皇帝時叙斬獲逃亡功並以所管人丁增多予三等輕車都尉世職尋卒子常山保襲未幾常山保亦卒以世俊襲職仍任佐領兼叅領崇德五年大軍圍明錦州世俊以紅衣礮克取馬家湖臺六年復圍錦州明兵據呂洪山口世俊同都統金礪督兵擊敗之七年攻塔山杏山毀其城八年隨鄭親王濟爾哈朗證明寧遠克前屯衛中後所二城順

治元年二月叙功晉世職為二等輕車都尉五月
大兵既定燕京世俊隨都統葉臣招撫山西時流
賊李自成遁陝西其偽伯陳永福猶據太原世俊
同諸將攻克其城山西既定還至中途值鮑家莊
土賊肆掠世俊同都統阿賚率兵捕勦之盡殲其
衆二年隨英親王阿濟格追勦自成於陝西屢敗
賊衆自成走湖廣三年七月隨端重親王博洛征
浙江時明閣部朱大典據金華世俊攻破其城大

典自焚死餘黨恚平是年擢都察院左副都御史
六年授正紅旗漢軍副都統三遇

恩詔晉世職至三等男十年以疾解任十八年六月卒

賜祭墓如例子延祚襲爵康熙八年延祚卒子雲龍襲十

四年

聖祖仁皇帝命貝勒洞鄂征陝西叛鎮王輔臣雲龍隨征
將至平涼賊衆迎拒雲龍率本旗兵衝其陣大敗
之二十年隨貝子彰泰征逆賊吳世璠敗賊將線

緘於盤江西坡追至砂子哨及腊茄坡屢塞賊藪
遂進征雲南距城四十里立營擊敗賊將吳國柄
等偽國公馬寶偽將軍巴養元逃至烏木山盤踞
林谷設鹿角扼險以守雲龍隨都統希佛提督桑
額往勦擒斬甚衆二十五年叙功晉爵二等男四
十八年十一月卒子璘改襲一等輕車都尉

甯完我

甯完我遼陽人天命年間來歸事貝勒薩哈廉隸

漢軍正紅旗

太宗文皇帝召直文館尋授叅將天聰四年大軍破永平
命同館臣達海等執黃旗登城諭士民安業尋隨貝勒阿
巴泰等守永平又從征大凌河及察哈爾並招撫
有功授騎都尉世職五年十二月上疏言臣蒙

皇上出之奴隸登之將列不揣庸愚妄自期許初被

召對輒薦五人復公疏請立六部設言官今六部已立不
設言官者意以為國人皆得進言耶又或謂南朝

多設言官竟致敗壞耶臣請明辨之我

國未立六部之前臣不具論自六部既立之後曾見
疏劾人罪者否今日秉政之人豈盡循良方正
屬下者既不敢非其官長旁人又誰敢輕議權貴
古云兼聽則聰偏聽則蔽若設言官人必自斂君
身尚許諫諍他人寧知忌諱此古帝王明目達聰
之大用也南朝之言官壞事由伊主之鑑別不明
非洪武定制之不善臣自揣無經緯之才惟忠耿

之心至死不易今再行奏

聞以明始終無欺不勝悚慄之至六年六月與范文程馬

國柱疏陳伐明之策九年二月言頃奉

聖諭各薦舉賢能以供任使孰意無知之輩反假此為倖

進之階臣思自古薦舉之條功罪連坐所以杜弊

端而防冒濫伏願再頒

明詔自後所舉之人或効能叙功或僨事獲罪皆令舉者

同之若其人砥行於厥初改節於末路許舉者隨

時檢舉乃免連坐如此庶人知畏法而所得皆真才矣

太宗並嘉納之十年二月罷職先是完我留守永平以好博為禮部叅政李伯龍等所訐奉

諭諄誠宥其罪至是復與大凌河歸附叅領劉士英博為士英家人舉發論罪革世職凡

恩賜莊田奴僕悉入官遂閒居數年

世祖章皇帝定鼎後起用為學士順治二年五月授宏文

院大學士充明史總裁官二年至六年三充會試
主考官又充纂修

太宗實錄總裁官並繙譯三國志洪武實訓諸書告成

賜賚優渥授二等輕車都尉世職八年遷國史院大學士
十年四月內院以完我與洪承疇等班位祿秩應
否照漢官例奏請完我獨承

吾照滿洲大學士例尋授議政大臣十一年三月疏劾大
學士陳名夏曰古來奸臣賊子黨不成則計不得

行欲成奸黨附已者雖惡必護異已者雖善必仇
行之久而入黨者多矣始也借人以引已繼也納
賄以引人若非確訪其鄉評輿論實察其居心行
事則黨固而莫可破臣自念壯年疎慵貪博辜負
先帝一廢十年

皇上定鼎燕京復得隨入禁地矩趨公署凜守臣職者又
復十年於此愚直性生遇事勃發雖不敢行埋輪
補牘之事若附黨營私以圖目前富貴寧死不為

痛思人臣貪酷犯科國家癘疥之疾不足為慮惟
懷奸結黨禍闢宗社患莫大焉陳名夏奸亂日甚
黨局日成臣不憚舍殘軀以報答

聖主並列其罪狀請

勅大臣鞫訊事詳陳名夏傳八月加太子太保十三年考
滿加少傅兼太子太傅十五年九月以老乞休奉

諭曰大學士甯完我効力多年勤勞素著今因年邁有疾
令原銜致仕以遂頤養康熙元年

聖祖仁皇帝念其贊理機務年久
命以一子補用學士四年四月卒

賜祭立碑謚文毅

吳守進

吳守進遼陽人後隸漢軍正紅旗初事

太祖高皇帝以功授三等輕車都尉世職天聰五年

太宗文皇帝詔定官制設六部守進任戶部承政八年考

滿晉一等輕車都尉時始設漢軍世管佐領守進

兼任之崇德三年正月奉

命與額駙英俄爾岱等察戶部承政韓大勳盜取庫物坐
察核疎忽論罪輸罰鍰七月更定官制改任左叅
政四年正月以勒索官商金及侵冒工值等事下
部論罪應死籍沒得

旨從寬革世職解部任籍家產半仍署副都統事六月授
正紅旗漢軍副都統六年隨睿親王多爾袞武英
郡王阿濟格征明錦州以紅衣礮攻克塔山四臺

斬馘無算生擒其副將王希賢叅將崔定國等七
年六月擢本旗都統七月率兵攻明松山杏山同
都統金礪擊呂洪山口所屯敵兵敗之松山兵遁
入杏山附近二臺復同都統劉之源攻克之遂拔
杏山城尋奉

命與副都統馬光輝等往錦州督鑄紅衣礮八年隨鄭親
王濟爾哈朗征明寧遠攻取中後所前屯衛二城
順治元年正月叙功復授三等輕車都尉世職五

月同都統葉臣往平山西攻太原府城克之凱旋
得

優賚尋隨豫親王多鐸追勦流賊李自成明年四月移師
下江南

詔頒賚王貝勒大臣之宣力戎行者守進得

賜蟒服五月偕都統圖賴敗明軍於揚子江獲其戰艦克

揚州府及江陰縣城并下嘉興府三年五月叙功

晉一等輕車都尉四年授定西將軍駐劄漢中五

年八月卒年六十有二長子國柄襲隨征湖廣有
功官至副都統七年遇

恩詔加一雲騎尉尋卒以守進次子國正襲

焦安民

焦安民漢軍正紅旗人初授吏部啟心郎崇德九
年甄別各部院官安民列二等

賜人戶牲畜八年考滿授佐領順治元年遷山西雁平道
二年四月擢寧夏巡撫疏言雁平村舍凋零寇盜

充斥守備上官清都司鄭應亨晝夜巡緝士民得
安請携二人隨往寧夏委用從之十一月

上諭督撫等宣力封疆功勤勞苦茲值嚴寒尤深注念

賜安民錦裘貂褂各一十二月疏言臣巡歷河東諸營堡

惟靈州營水灌沃壤兵多務農餉不足猶可藉農

養其餘營堡兵皆鶉衣百結鵠立難支查靈營西

南有民堡八向招人耕種屯糧以供兵馬需近因

花馬興武等營歲荒將此項屯糧通融分給以資

接濟伏思守土在軍足食在農斯時有荒可墾苦
無牛隻現存耕牛六十一隻堪給兵開墾又原任
總兵南一魁取舊存馬價銀二百兩為製弓矢用
應追原價貯庫寧驛久廢稽公務請將此銀買驢
羸發附郭等駟稍供走遞庶齋奏無誤又言寧兵
月餉現在屯課徵收者支放殆盡貧民逋欠者追
比難完三軍枵腹待哺請撥秦餉三萬兩以濟饑
兵下部議如所請三年三月副將王元馬德以營

兵趙銳等罪責入獄乘釁統衆突入撫署安民遇害元德等尋伏誅安民贈右都御史廕一子

賜祭葬如例

蘇宏祖

蘇宏祖遼陽人隸漢軍正紅旗崇德三年由舉人授戶部啟心郎

賜朝衣一襲免丁四名八年考滿稱職給雲騎尉順治元年授河南河北道三年遷山東布政使五年調陝

西布政使九年三遇

恩詔晉三等輕車都尉十年五月巡按御史高爾位劾該
督等計典失實連及註考藩臬宏祖降二級調用
十一年補福建布政司左叅政分守福寧道十三
年遷左僉都御史十五年六月擢南贛巡撫十七
年四月山賊李玉庭糾黨雩都負固劫掠宏祖發
贛城兵捐資製火器奮勇搗巢玉庭就擒事

聞下部議叙尋以老病乞罷

上未許時賊渠謝上達結海寇鄭成功并糾羅一鑑徐黃
毛等賊據廣東平遠五指石界連閩贛六月宏祖
會閩粵兵合勦上達詐降潛逃紅畚宏祖授將材
李宗韜以計擒斬一鑑黃毛等七人乘夜進攻賊
倉皇遁走連追至柑子窩中木溪悉捕斬遂毀五
指石寨進勦紅畚諭賊黨縛渠自首得免罪未幾
縛上達獻誅之十八年五月遣遊擊王什勦廣昌
賊乘雨攻不備連破滴水羊石二寨斬千餘級擒

賊渠幸連升蕭來信叙功加一級時地方初定學
宮傾圮宏祖首倡捐修康熙元年二月甄別督撫
大臣

命宏祖以原官致仕三年四月卒

賜祭葬如例

劉清泰

劉清泰遼陽人隸正紅旗漢軍初名朝卿

太宗文皇帝賜今名崇德六年由諸生試一等入內院辦

事順治二年擢宏文院學士六年充纂修

太宗文皇帝實錄副總裁九年充會試副考官教習庶吉

士尋授浙閩總督時海賊鄭成功據廈門陷漳浦

海澄南靖

上賜清泰勅曰鄭成功屢擾沿海郡縣本應翦除但昔年
大兵下閩其父芝龍首先歸順其子弟何忍背棄父兄
甘蹈叛逆此必地方官不善開導致彼疑懼反側今已
命芝龍作書遣人往諭如果悔罪歸順不吝爵賞爾當

宣布朕意使之悅服十年二月清泰疏劾巡撫張學聖
巡道黃澍總兵馬得功前此偵成功赴粵潛襲屢
門攫其家貲致成功索償修怨連陷城邑疏下部
議學聖等並罷黜三月清泰得成功自海上報芝
龍書因疏言成功妄覬浙東粵東地安插兵衆語
涉浮誇與其更張於既撫之後不如詳慎於未撫
之先得

旨所奏具見深識遠慮仍相機而行五月平南將軍金礪

攻海澄將克之以餉不繼還軍漳浦會

頒勅招撫成功封為海澄公遂罷兵清泰疏請於浙閩兩
省調兵一千駐守浦城增設遊擊守備等官部議
從之十一年清泰以成功既奉

詔許給泉漳惠潮地仍不獲髮其黨違掠如故疏言成功
無歸誠實意宜

勅遣八旗兵赴閩駐守要地以資策應下諸王大臣議清
泰旋以病乞假成功復寇掠漳州泉州

上命定遠大將軍濟度率兵往勦左都御史龔鼎孳劾清
泰一籌莫展當將軍金礪攻圍海澄不能同心合
力及招撫未就又不控扼險要回駐杭州藉病息
肩致海疆被陷疏下部議革任十八年

聖祖仁皇帝御極起為秘書院學士尋授河南總督康熙
元年築開封城清泰疏言城工浩繁未可以歲月
計官民捐輸者俟工竣議叙未免觀望不前請按
季報部錄叙以觀速效部議如所請三年以報壑

荒地一萬二千餘頃加銜兵部尚書四年五月以疾致仕八月卒

賜祭葬如例

王國光

子永譽

王國光漢軍正紅旗人先世為滿洲姓完顏父王
一屏初為明千總

太祖高皇帝天命四年征明取開原城一屏率所屬來歸
賜人口馬駝銀幣授佐領

太宗文皇帝天聰八年予三等輕車都尉世職國光初任
佐領兼戶部理事官崇德七年襲父職擢正紅旗
漢軍副都統兼戶部叅政八年隨鄭親王濟爾哈
朗征明攻克前屯衛中後所二城順治元年叙功
晉世職二等輕車都尉是年改六部叅政曰侍郎
國光仍任戶部侍郎兼副都統三年隨定西大將
軍和洛輝駐防西安有逆賊孫守法胡向宸據興
安山峪出犯西安國光率兵擊却之又擊敗賊黨

歐文炳等以雲梯拔其寨獲馬騾器械無算五年
考滿晉一等輕車都尉是年十月遷本旗都統六
年隨英親王阿濟格征大同叛鎮姜瓖攻克左衛
朔州汾州太谷四城八年正月叙功晉三等男尋
遇

恩詔晉一等男四月河間佐領碩爾對訐告給餉不均事
戶部諸臣坐降革有差國光以前任侍郎降一等
輕車都尉九年遇

恩詔加一雲騎尉十年正月

上以前此戶部諸臣處分過重令核議寬減復國光一等
男二月隨定遠大將軍貝勒屯齊征湖廣擊敗李
定國兵於永州又敗孫可望于岔路口多所斬獲
十二年海賊鄭成功張名振等合犯浙江國光同
寧海大將軍伊勒德統師往征敗賊舟山十三年
二月授兩廣總督

賜蟒服鞍馬並

諭獎其才品優長足勝委任加太子太保十五年大兵三路分勦明桂王朱由榔征南將軍卓卜特由廣西柳州慶遠一路進征國光疏言大兵取道柳慶恐黔滇諸賊由南寧來犯因遣叅將張榮周貴率兵赴梧潯協力堵禦疏入

報聞六月以疾解任還京十八年

聖祖仁皇帝御極授鎮海將軍統兵駐防潮州康熙三年同平南王尚可喜會師勦碣石叛鎮蘇利至海豐

偵賊設伏要路欲奪我大礮隨分兵擊敗其衆遂
進師燈籠山蘇利乘我軍未及成列率衆萬餘突
來薄戰我軍左右夾擊賊衆潰遁追薄碣石衛城
四面環攻拔之擒斬蘇利及偽總兵陳英偽副將
李慧等餘黨竄匿各寨國光督兵由惠來分勦連
破賊寨偽總兵陳義鄭盛率衆扼險抗拒我兵奮
勇掩擊鄭盛勢窮自縊死陳義中創僅以身免四
年因病乞休

溫旨慰留之明年

詔率所屬還京仍任本旗都統八年以老致仕九年正月

卒

賜祭葬如典禮謚襄壯子永譽襲爵康熙十三年正月授

河南提督四月河北總兵蔡祿叛應逆藩吳三桂

內大臣阿密達率兵往勦擒斬之永譽奉

詔赴懷慶拊循士卒因請暫駐其地防守九月

上以安慶為兩江重地令設提督調永譽任之時逆藩耿

精忠遣偽都督宋標等陷江西饒州遂犯徽州十
四年永譽督兵駐建德令叅將傅爾學進勦賊衆
千餘沿山扼險我兵分隊擊之斬級無算俘宋標
磔於市尋以簡親王喇布疏請增兵永譽率所屬
移守徽州十二月征南將軍穆占以吳逆堅守衡
州乞調永譽助征

上以徽州要地未便調遣不允十七年江西平裁安慶提
督改永譽為江南提督移駐松江十九年遷廣東

將軍二十年疏言粵東瀕海地宜修理戰艦移兵
防守請改陸路兩鎮各一營為水師以供調遣部
議如所請二十二年王大臣議以兩鎮官兵歸總
督統攝分撥各汛地防守永譽疏言海疆重地省
城尤為扼要應留兵四千駐防

上允所請二十七年授本旗漢軍都統三十年

命定北將軍瓦岱領兵赴張家口偵防噶爾丹永譽同都
統喀岱等叅贊軍務三十五年

上親征噶爾丹分漢軍為四營永譽統領正黃正紅兩旗
由中路進噶爾丹聞大兵至不戰而遁永譽同平
北將軍馬斯喀督兵追躡偵賊遠竄乃還三十六
年隨

駕寧夏

命督運軍糧留貯黃河西岸要地監守之及大將軍費揚
古奏報噶爾丹竄死凱旋兵出境乃還京四十三
年二月卒祀河南名宦子興武改襲一等輕車都

尉兼一雲騎尉

今上乾隆十八年二月王興武之子福山及族人並得
旨改隸滿洲正紅鑲白二旗

郎賽

子阿爾泰

郎賽漢軍正紅旗人本姓劉世居鐵嶺初為驍騎
校崇德七年分設漢軍佐領令管壯丁二百名隸
正紅旗八年九月隨鄭親王濟爾哈朗征明寧遠
取中後所及前屯衛叙功予雲騎尉世職十二月

隨征黑龍江俘獲甚衆順治元年四月睿親王多爾袞討流賊李自成郎賽率兵前驅敗偽總兵唐通于一片石十月隨豫親王多鐸追剿流賊至陝西二年隨征江南攻克揚州及崑山常熟嘉興等縣預有功晉世職騎都尉七年任兵部郎中兼叅領三遇

恩詔晉世職至一等輕車都尉是年遷正紅旗漢軍副都統十三年閏五月擢本旗漢軍都統六月以海賊

鄭成功獨獬

命掛寧海將軍印駐防福建十四年攻閩安鎮克其城十
七年同都統索渾護軍統領賚塔等勦賊廈門官
軍不習水戰失利罷任逮問革世職康熙十年六
月卒子阿爾泰初由廕生授吏部員外郎順治七
年遷郎中十二年授佐領尋兼叅領康熙三年出
任湖廣辰常總兵七年調浙江黃巖總兵十三年
八月逆藩耿精忠叛黨曾養性祖宏勳等由溫州

驅賊衆陷黃巖提督塞白理時駐寧波疏言臣與黃巖總兵阿爾泰久為婚姻素以忠義相勗前聞叛賊祖宏勳陷溫州議與合兵討賊彼亦以不負國恩自許故一聞黃巖內變臣謂阿爾泰必死乃九月初六日據陷賊逃回之臣標千總高興言黃巖城破係城守叅將武灝先行通賊受偽總兵職致拒賊兵丁陣亡者三百總兵阿爾泰亦已割辮從賊受偽將軍職臣思阿爾泰世受

國恩不能死節忍受偽職狗彘不食其餘阿爾泰之
女舊與臣長子銓德為媳臣欲逐去又無家可歸
去留生殺悉候

聖裁疏下王大臣議以塞白理之媳係阿爾泰舊日出嫁
之女應仍留塞白理家阿爾泰之長子佐領劉紹
烈駐防京口現調往杭州應就近收禁十四年康
親王傑書統師駐金華疏言阿爾泰不肯從逆為
賊縊死兵部奏釋劉紹烈仍以佐領赴貝子傅喇

塔軍前効力十五年八月署叅領勦賊處州戰石塘嶺歿于陣十六年三月福建巡撫楊熙疏陳阿爾泰權宜詐降以圖恢復為賊伺知十三年十一月拘至福州十四年正月耿精忠使人縊死南門通衢部議贈右都督予卹廕

詔以恩卹忠節關係大典令再確察情節部臣奏阿爾泰先經康親王疏稱不肯從賊今巡撫楊熙復察寔被賊戕害應照例贈卹得

旨不准加贈仍

賜祭葬如例二十五年

賜劉紹烈卹銀予雲騎尉世職以阿爾泰之次子劉紹韜

襲四十年劉紹韜因疾罷以其子伊理布襲雍正
七年阿爾泰劉紹烈並入昭忠祠

劉秉權

劉秉權漢軍正紅旗人順治元年任兵部主事九
年三月遷刑部啟心郎十五年裁缺改刑部主事

十七年七月遷戶部員外郎十八年

詔前此由啟心郎改主事者仍以四品用康熙元年正月
遷僉都御史三年十二月擢國史院學士六年十
二月授廣東巡撫先是順治十八年以沿海江浙
閩粵數被海賊劫掠且有奸民交通接運

詔遷沿海居民于內地至是廷議展界復業

上遣都統特錦等會勘廣東沿海邊界設兵防守安插遷
民秉權與總督周有德疏言粵民聞展界之令相

慶復歸故土而田疇久荒其墾復者應年終冊報
俟三年後起科尋疏言粵東有荒棄屯地三千五
百餘頃舊額每畝科米三斗較民田多數倍民不
敢承墾請照民田一例起科庶屯賦不致虛懸又
疏言新還故土之民耕墾無資必量給牛種助其
畚鍤粵東積穀以備賑向即賑此遷移失業者居
多自康熙六年以來共存穀四萬二千餘石請量
留二千石備給因糧餘悉酌給復業之民使資牛

種則民沾寔惠穀無漏卮較每歲零支賑濟更有
盈寧生聚之效三疏並下部議從之九年閏二月
御史徐旭齡摘秉權履任後諸奏章劾其庸懦無
能依違成習徇庇容隱舛誤遲延

命秉權回奏秉權疏辯仍下部察議劾款俱經秉權辯釋
惟屯糧奏銷由戶部駁詰改正秉權難辭舛誤之
咎罰俸一年六月疏報康熙八年分安插丁口十
萬二千一百有奇墾復田地一萬七百四十餘頃

十年五月疏報九年分安插丁口三萬一千四百
有奇墾復田地七千八十餘頃十一年五月奏報
十年分安插丁口二萬五千九百有奇墾復民屯
田地七千三百八十餘頃得

旨廣東海疆要地劉秉權連年安插人民墾復地畝為數
甚多具見盡心料理十三年四月聞逆藩耿精忠叛應
吳三桂疏言福建巡撫劉秉政係臣同父異母親
兄雖自幼各居已久今福建有變撫臣偷生臣處

嫌疑之際壑

恩罷斥歸旗待罪疏入

命吏兵二部會議時廣西將軍孫延齡亦叛平南王尚可
喜疏言秉權履任以來廉靜和平素為文武兵民
信服自廣西告變臣與商酌機宜見其智識淵深
議論慎密信之重之當茲多事之日籌兵策餉正
資熟練提督嚴自明偕總兵司道等合詞籲留謹
據情入告

詔秉權仍留任五月秉權疏言孫延齡黨附吳逆叛居桂

林已會疏請

旨發兵攻勦但桂林城堅靠山倚水必須礮火制勝今與

平南王議發紅衣大礮四十位以木馬船載之并

備火藥器具送往以冀速奏捷音又疏言潮州總

兵劉進忠勾通閩逆據潮反叛各郡民心惶擾土

寇乘機竊發乞

敕江西發兵一千來粵以資勦禦又疏言耿逆鳴張如聽

其安閒布置招兵集餉來犯始應非計之得也請

敕浙江兵分兩路進勦一由江山縣取浦城一由温州府

取福寧江西兵亦分兩路一由建昌府取光澤一

由瑞金縣取汀州粵東恢潮之後即進取漳州之

詔安閩中文武荷

朝廷養多年一旦脅從原非本意五路並進各郡

自必聞風內應改邪歸正耿逆孤雛腐鼠屈指滅

亡當在數月之內再乘此兵威移勦吳逆先聲所

至已奪其魄若桂林叛賊大勢更在耿逆之下摧
枯拉朽又不足言矣又疏報碣石衛山賊水寇乘
機竊發圭湖青子等鄉有賊徒二千餘人犯甲子
所城遊擊李復竒督兵擊敗之六月疏報勦捕藏
匿偽隆武勅印之賊首李唐宗及其子於永安縣
南嶺斬之餘黨悉平八月疏言逆賊劉進忠自恃
潮城險固負嵎拒敵挖溝樹柵堅守葫蘆大山以
為屏障都統提鎮諸臣雖已三戰三勝而官兵冒

暑勞苦仰擊甚難耿逆又發援兵將至臣有提督
軍務之責現擬親率藩撫各標官兵自省往潮與
都統提鎮諸臣相度形勢分布險要絕其外援斷
其糧道乘機誅擒逆惡用彰

天討尋疏報勦殺沿海水賊千餘級陣擒賊首陸老初等
救回被擄男婦五百餘名九月秉權率師至潮州
城南隅有鳳凰洲河道外通大海內接城壕為糧
道援兵必經之所劉進忠引逆黨六千餘人在鳳

鳳洲架木城二據之以耿逆所遣偽都督金漢臣
等列二營于鳳凰臺下秉權與都統尚之孝定議
進攻躬冒鋒鏑越塹排柵連破兩木城賊敗奔鳳
凰臺下劉逆親率二千餘衆迎敵官軍乘勝破其
三營賊大潰溺水死者無數劉逆以數十人遁入
城陣斬金漢臣等五千二百餘人擒偽副將蘇忠
等八十三人獲器械無算別遣副將何九衢等攻
復澄海縣十月遣總兵苗之秀攻克揭陽南北礮

臺二殲斃賊黨甚衆招撫偽官四十五員水陸營
兵三千九百餘名復揭陽潮陽二縣十一月卒於
軍遺疏至得

旨劉秉權撫粵有年寔心任事近以潮逆負固督兵進勦
得獲礮臺招復三縣克奏膚功不意積勞成疾遽爾奄
逝朕心深為憫惻下部從優議卹

賜祭葬如例謚端勤子思儼由廕生任郎中秉政者初任
直隸雞澤知縣順治九年行取授雲南道御史十

五年遷太僕寺少卿十六年遷左通政尋任寧夏
巡撫康熙四年裁缺五年補福建巡撫十三年逆
藩耿精忠叛秉政從逆十五年十月康親王入閩
耿精忠窮蹙乞降

詔秉政來京旋病死論罪籍其家子孫沒入內務府

劉漢祚

劉漢祚漢軍正紅旗人由生員任直隸河間知府
順治三年遷寧武兵備道五年遷江南左布政十

二年

詔內外大小官員直陳民隱司道府各許奏職掌事宜一
次漢祚疏陳五事一江南本色顏料應照各省府
縣自行解部一請留州縣起運錢糧十分之一備
買草豆以濟軍需一催提協餉宜按季解濟一江
南驛站已題明止用本地裁省銀兩至山東直隸
請免提江南協濟一有主荒田亟入興屯俾民無
包糧之累有司得按寔徵收

上以其言可採下所司議行十三年巡按秦世楨以漢祚
轉運軍需正已率屬舉薦擢福建巡撫時海逆鄭
成功襲陷閩安鎮山賊紛起漢祚入境疏奏地方
彫敝情形及籌餉諸事次浦城招撫山寇林雲魏
賜等收其偽印兵器檄各路員弁會勦海寇陳德
容破其黨蔡赤潘桂等疏入報

聞時廷議裁併直省各道下各督撫議漢祚言閩疆多事
所恃各道聯絡堵禦分汛嚴防未可輕議裁併

上從之十二月招降偽都督李鳳等一百五十餘員十四
年正月疏言左都御史魏喬介請以浙閩總督移
駐漳州蓋因漳近海澄藉以控禦鄭逆今海澄已
歸版圖漳僅閩海一隅若偏處於漳不惟不能顧
浙亦不能顧全閩逆賊竊據閩安鎮等處離省城
僅三四十里督臣應如舊駐衢州浙閩江西三省
適中之地調度兵將規復閩安以固根本得

旨如議三月疏報賊渠偽都督何傳偽將軍林文隆播虐

於侯官古田閩清建寧偽都督鄭飛熊擾害建安
甌寧已非一日臣仰體

皇上好生之仁同督臣遣員招諭傳及文隆繳到偽印率
偽官兵四百二十二員飛熊亦率偽官兵三百七
員名來降得

旨嘉獎前巡撫宜永貴奏平海寇未及提督馬得功在侯
官夾擊事部以提督逗留飭查漢祚為疏辯賊逼
省會雖退未肯遠離自馬得功渡江夾擊賊圍始

解查問官兵如出一口提臣寔有戮力之功無逗留之弊下所司知之又疏言閩省山海交訌在在防勦非同無事地方經制官兵未可一例裁汰又言宜永貴不行奏明動支叛產銀兩賞給將士寔因逆賊傾巢入犯省會兵力單薄永貴與疾登陴高懸賞格危疆賴以保全其用項應請開銷俱下部議從之十一月疏言海逆恃海憑舟乘潮出沒前盤踞閩安鎮經年築城建寨勢甚堅牢今幸

皇上威靈行間文武戮力迅攻克復賊膽已寒是以盡撤賊營聚集左廣造巨艦復圖飄忽一切沿海汛防將領臣俱星檄勤密戒嚴無煩

睿念外惟是漳泉興福以及雲霄漳浦南靖詔安等處必須增兵造船為一勞永逸之計下所司議速行先是總督佟岱劾侍郎周亮工任閩藩時貪酷四十款下撫按勘訊刑鞠如佟岱指

詔亮工任閩質訊會佟岱以他事解任漢祚審得各款皆

虛以案情重大承審官同犯證解部定擬亮工後
得免死起用事詳本傳於是御史張所志劾漢祚
才庸年邁避怨避勞於重案依違兩端請罷斥漢
祚亦具疏乞休從之御史許之漸續劾漢祚賍私
等款在閩候質巡按范平訊無據之漸以妄奏議
處漢祚年老休致免議後十餘年卒於家子光美
由筆帖式任貴池縣知縣康熙十九年擢監察御
史二十七年遷內閣侍讀學士四十一年遷內閣

學士四十二年擢安徽巡撫四十八年以匿災不報降五級調用

王之鼎

王之鼎漢軍正紅旗人都統王世選子也順治七年襲父二等子爵九年遇

恩詔晉一等十年署叅領隨寧遠大將軍貝勒屯齊征湖

南擊走孫可望兵十三年十月授正紅旗漢軍副都統十五年十二月隨安南將軍明安達禮駐防

貴州十七年還京十八年

聖祖仁皇帝御極授福建中路總兵康熙二年八月會兵
進取廈門海賊鄭錦以兵萬餘來犯之鼎督兵數
十戰斬殺甚多遂克廈門金門及古浪諸島三年
三月同提督王進功敗賊帥黃盛林茂裴德等拔
銅山賊巢叙功晉爵三等伯八年十一月仍授本
旗副都統十年授江南提督十二年擢鎮海將軍
駐防京口是年冬吳三桂反明年二月耿精忠亦

叛海賊乘機煽亂

上以安慶為江南上游要地

命之鼎遣副都統一員領兵千名防守安慶而以安南將軍華善率八旗官兵同之鼎於京口駐防五月之鼎以賊船往來無定請調江陰瓜洲戰艦集天寧洲令右路總兵侯襲爵督率訓練以備戰守七月疏言黃浦水汛外通大海內達蘇松更有沿海馬道下抵杭州上接京口請撥崇明沙船七十令八

旗及綠旗官兵駐黃浦操防設遇賊船飄突水則
舟師整備以扼要隘陸則馬道飛馳共圖撲剿似
亦防禦之一法也疏俱得

旨俞允九月

勅簡親王喇布為揚威大將軍率兵駐江寧之鼎叅贊軍
務十七年十一月

諭兵部曰王之鼎才畧素優鎮守京口克稱厥職著調補
福建水師提督加定海將軍之鼎聞

命疏言京口兵有願移福建効力者請以一千名支給行糧隨征下部議從之十八年五月改授四川提督十九年四月疏言蜀省幅員數千里川南各路接壤雲貴密邇逆巢川西一路隘口直接西番時虞窺伺臣既膺提督之責宜整練標兵相繼應援今以原帶京口官兵一千名改設中營而左右二營有官無兵請准召募精銳充伍以資戰守又蜀疆初復非承平無事可比一遇有警非馬不能疾馳

請以步七馬三為額部議提標二營缺額之數現有隨征總兵何成德等官兵二千餘名可暫充補而四川提標經制原係馬二步八又未令進勦雲貴應無庸添設寢其奏是月賊將尤廷玉等犯永寧之鼎統師進勦先遣總兵劉魁率精銳馳赴永寧值賊兵已據城南山箐列寨劉魁同總兵李芳述分路進戰冒矢石奮勇衝擊陣斬偽總兵毛友貴等大敗賊衆獲器械無算六月勇畧將軍趙良

棟以大兵將進勦雲貴調李芳述等往叙州而留
之鼎駐防永寧八月賊將胡國柱以逆書附陷賊
來歸之廝卒煽誘我軍之鼎具狀以

聞時賊既陷瀘州復犯永寧之鼎拒守月餘外援阻絕九
月九日賊穴城城陷總兵斐雅達劉魁何成德遊
擊陳先鳳等並為賊困之鼎解印付家人陳善曰
吾義與此城存亡爾可間道走成都歸印

朝廷分遣畢遂大呼率官兵巷戰手刃數賊羣賊蜂

至左腋被創為賊所執遂至貴陽逆孽吳世璠遣
人說之降之鼎罵賊不屈賊以必加項之鼎神色
不變瞋目大罵曰鼠輩何不速殺我天兵不日盡
誅汝等耳遂遇害事

聞得

旨王之鼎兵力單弱堅守孤城衆寡不敵遂遭賊陷乃志
不屈賊盡忠殉難深可憫惻下部議卹贈太子少保廕

一子四品官

賜祭葬如典禮謚忠毅櫬至京

遣內大臣往奠子毓秀襲三等伯三十四年祀江南名宦

三十六年子毓賢官貴州布政使貴州巡撫閩興

邦以士民籲建之鼎祠於貴陽毓賢自任其費請

賜祠扁入奏

御書忠節垂芳

賜之四十六年

上南巡幸松江府

御書純忠遺愛

賜其祠雍正七年入祀昭忠祠

吳興祚

吳興祚漢軍正紅旗人順治七年以貢生授江西萍鄉知縣再任山西大寧知縣十八年遷沂州知州尋以驛務遲誤降調康熙二年補江南無錫縣知縣十三年八月遷行人司仍留任十四年四月漕運總督帥顏保疏陳興祚涖任後清釐錢糧代

輸前任歷年逋賦積弊一清又招徠流民復業捐
給牛種陞科四千二百餘畝又立法徵漕倉場肅
清盡除折勒之弊列疏保題吏部以吳興祚有本
任未完漕項停陞之例議駁奉

旨吳興祚准照該督所薦行十五年陞福建按察使時逆
藩耿精忠降

詔命仍留靖南王爵率所屬官兵進勦海寇逆賊朱統錫
先受耿精忠敕遠將軍偽印聞精忠已降遂自稱

宜春藩盤踞貴溪為江浙閩三省大患興祚抵任
輕騎至光澤招撫偽都督陳龍施廷宇等統鋁竄
入江潯山興祚計令投誠之偽總兵蔡淑佯回賊
營為內應隨遣陳龍率所部導大軍直搗賊穴獲
朱統鋁子朱義潛侄朱義質賊勢大蹙偽總兵馮
珩等縛朱統鋁以獻獲其偽敕遠將軍銀印降偽
官一百八員兵九千餘十七年五月擢福建巡撫
時海賊鄭錦以臺灣為窟穴廈門為門戶分遣其

偽帥劉國軒等窺伺漳泉興三府興祚始受事漳泉屬縣相繼告陷泉州被困日久七月興祚率標兵由興化陸路進勦抵仙遊縣偽總兵黃球等擁衆數千結連沿山土賊萬餘屯據白鴿嶺興祚分兵三道自當中路與賊遇自辰至酉賊殊死戰不退我兵從旁奮擊遂奪取白鴿嶺關口斬級六百餘墮岸溺水死者無算賊大潰復追敗於嶺頭灣克復永春縣城遂遣兵分左右翼進勦再復德化

縣城賊帥劉國軒聞風遁去尋仍以巨艦數百出
沒於赤嶼黃崎諸處興祚遣發水師總兵林賢揚
颿出海遊擊王祚昌徐德濟通判陳君翼同知陳
子威乘風前進千總陳春張景咸以火箭飛射三
路夾攻賊大潰焚沉賊船六十餘擒斬賊衆六千
餘焚溺死者不可勝計興祚謂欲絕海寇全藉水
師疏請增募水師二萬

詔從所請七月興祚遣驛傳道王國泰等招降偽總兵蔡

冲琬林忠等三百八十五員兵丁萬二千五百餘
人招回島民男婦一千二百人得其偽闕防劄諭
印記無算獲船六十有七分撥水師營是年叙功
晉秩一品十九年正月興祚疏言鄭逆盤踞廈門
沿海數千里受其荼毒臣自去冬新造戰船工竣
水師提督萬正色分配將士由閩安鎮駕出大洋
操演惟視舊存大小船艘修理工畢江南礮手齊
集即行配駕相機進勦若過二月風汛轉南我師

反在下風難以制勝今鄭逆悉調賊兵厚集海壇
距我駐師之地咫尺相對恐賊船一得順風肆出
侵犯我師必抽回內港以逆其鋒沿海各汛更滋
擾累莫若乘風勢利便先攻海壇毀賊門戶並水
陸夾攻以分賊勢今議以水師攻取海壇臣統標
兵捷赴同安會同總督將軍調度陸兵配駕八檣
船由海倉松嶼潯尾石潯分路進取廈門疏下王
大臣會議如所請行于是興祚自泉州港會同寧

海將軍拉哈達總兵王英道同安進取廈門賊將
分據兩州潯尾二要口興祚發紅衣礮攻克之直
趨廈門斬溺無算賊大敗潰散遂克廈門復遣兵
取金門餘賊悉竄臺灣興祚因請留澳民防守蠲
免荒田糧減關課提督萬正色亦疏請於海澄廈
門等十四處設鎮分防

上命兵部侍郎溫岱前往會同詳閱定議溫岱至閩姚啟
聖與言克復海壇時正色與偽總兵朱天貴密約

投誠然後進兵並無殺賊攻取之處溫岱回京兵部據其言入奏

上諭曰進勦海賊一事吳興祚萬正色會同定議志靖海氛不俟荷蘭舟師乘機進取正色水師先行出洋興祚率陸兵聲援驅除海逆迅奏膚功不得以朱天貴密約投誠謂冒濫軍功仍即與議叙二十年四月予騎都尉又一雲騎尉世職時海逆鄭錦死奉

詔乘機規定澎湖臺灣以原任右都督施琅熟悉海寇情

形充水師提督尅期進師施琅疏奏巡撫吳興祚
決意進兵臣職領水師理應獨任且未奉有督撫
同進之

旨奉

詔吳興祚有刑名錢糧之任不必進勦二十一年正月擢
兩廣總督興祚疏言粵民受逆藩數十年之害利
盡錙銖如鹽埠一項額課一十四萬有奇此蓋千
百商民湊合資本行運逆藩以鹽為利藪強佔鹽

田場埠鹽課無出商民並累此粵民受困之一也
廣屬渡稅三百八十餘處逆藩兵卒羅踞津口重
加稅錢又不許增船分載往往人多載重渡民被
溺此又粵民受困之一也粵貨至境舊有落地稅
名逆藩創立總店銅錫鐵木之屬已納稅者重加
私斂下至鷄豚蔬果一概截抽此又粵民受困之
一也漁課舊額通省五千四百餘兩藩役委官重
斂苛征歲入鉅萬此又粵民受困之一也至市舶

一項原與民無害奸徒沈上達乘禁海之日番船
不至勾結亡命私造大船出洋為市今廷議許番
船自來在香山澳與商民陸地貿易內地之民既
不出洋仍與海禁無碍宜照舊抽稅以資國用伏
讀

恩詔有云逆賊盤踞地方橫徵稅課該督撫查明悉行除
免粵東一省如鹽埠渡稅總店漁課四項或應豁
免宜聽部議施行奉

旨悉行除免二十二年又疏請分駐廣東兩鎮官兵左鎮
統陸兵一千水兵二千駐扎廣州分防要汛右鎮
統陸兵三千駐劄韶州居中調度分防連陽英清
各要汛事下兵部又疏奏舊例廣西南太思三府
俱食廉鹽欽林等府俱食高鹽拆運良便後因鹽
田盡遷改銷梧引今高廉二府鹽田既復請仍舊
例改食高廉鹽路近價賤有便于民部議如所請
行又奏請廣州沿海地畝招民耕種

上諭曰前因海寇未靖故令遷界今若令民耕種採捕甚有益於沿海之民浙閩等省亦宜有之爾部遣大臣一員前往展界立限其詳閱確議勿誤來春耕作之期二十五年疏論潮州水師官兵向裁歸潮鎮水師統轄今開洋貿易恐宵小潛踪應以澄海協達濠營水汛官兵改歸南澳水師鎮統轄其南澳與碣石海汛相近令互相聯絡以密巡防部議允行初兩輿錢法不行興祚疏請撥銅設爐鼓鑄二十八年

六月給事中錢晉錫御史王君詔疏覈興祚鼓鑄
浮冒部議降三級調用尋奉

特旨吳興祚効力行間悉知軍務著以副都統用三十一
年十二月奉

命以副都統鎮大同右衛三十四年六月兵部疏劾右衛
將軍希佛等不收八旗撥送馬匹以致虛糜錢糧
議希佛革職興祚降三級調用從之時

上親征噶爾丹興祚奉

旨於沙克所坐臺三十六年正月奉

旨復原官二月以病卒孫吳奕曾襲騎都尉又一雲騎尉

世職

欽定八旗通志卷二百